

Diari

dad Alfons Berther-Schmid, Camischolas (1905 – 1985)

Il diari sesanfla egl Archiv cultural Tujetsch ella documentaziun da siu fegl Norbert Berther sut la numera O21. El pren si'entschatta culs 15 d'october 1945 e finescha ils 26 da schaner 1985.

Il diari ei d'ina generaziun che ha viviu ils onns 1940 tochen 1980 cun egliada clara e peis ferms sin tiara. Mintga notizia ei in toc vargau: naschientschas che dattan nova veta, annunzias da mort che fan patertgar, las nozzas, l'aura, occurrenzas particularas ed accidents ch'admoneschan. El contuorn da quei cuora il ritmus dallas lavurs agricolas, inclus l'alpegiaziun e scargadas – quei mund che s'orientescha tenor stagions, temps ed aura.

Il diari colligia il grond cul pign: ina malaura, ina nevada tardiva, il clom dalla baselgia, in num niev en famiglia, il crescher dil fein e risdiv ni ina viseta si d'alp. Tut quei vegn registrau cun in lungatg sempel, exact e real – buc per ornar, mobein per vegnir memorisau. Quei diari ei aschia ina memoria collectiva: el porta siu temps en plaids che vegnan dai vinavon per buca svanir.

Legi quellas notizias sco da gidar ad arver in tschaler da regurdientschas cun valetas cuzzontas.

Datum	Notizia
1945	
15.10.	Sligiau si las raziuns da caffè, cicoria, te, panetscha (Hirse) e textil.
20.10.	Nozzas: Schmid Felici e Mariuschla Berther, Zarcuns/Camischolas el Hotel Oberalp
23.10.	Nozzas: Loretz Sep Antoni da Mechel ed Ursulina Deflorin, Selva en la Pensiuin Soliva
27.10.	+ Loretz Franz da Mechel, Selva, in giuven da 20 onns, sedisgrazias a Tschamut, enten curdar 200 m giud ina suga da transport da lenna da Muot a Tschamut.
Raccolta	1945 ei stau ina buna primavera, ina caulda e schetga stad ed in bien atun, schau ora ils tiers gronds sil prau entochen ils 27 d'october. La raccolta da fein, risdiv e graun ei stada mediocra tochen buna (priu ora fein magher). Truffels ha ei dau generalmein fetg daried.
1946	
1.1.	+ Lezi Peder, Cavorgia, 80 onns
31.1.	+ Berther Giachen Fidel, Rueras, dalla daguota en ina radunonza da vischins en casa da scola, 57 onns (<i>Miu tat, remarca dil nuder.</i>)
19.4.	+ Adolf Cavegn, Sedrun, 83 onns
26.4.	+ Maria Beer-Deragisch, Sedrun
9.5.	+ Riedi Heinrich, Tschamut, 40 onns
5.5.	Stau fiasta da cant a Mustér. In bi di, mo buca tuts diltut cuntents cun il resultat.
Unviern	Stau in brut unviern cun pauc sulegl, bia neiv mo buca grondas ferdaglias. S. Giusep (19.3) han ins aunc mesirau 1.85 m neiv. Gl'avrel ha denton midau cassacca da maniera che la lavur funsila era per gronda part fatga calonda matg. Gl'emprem da matg han ei entschiet a schar ora ils tiers gronds. Ils 8 da matg fatg mundi cun ils s.v. pors e las nuorsas. Pia in avrel sco da regurdientschas mai stau in aschi bien.
12.5.	+ Tina Venzin-Peder da Fidel Giachen, Selva
15.5.	Neiv 40 cm

16.5.	Fatg mundi cun las cauras, mo han stuiu spitgar entochen ils 21 da matg per motiv da neiv.
30.5.	Las 4 ½ uras dil di in ferm tiaratriembel.
4.6.	Las 2 ½ uras dil di in lev tiaratriembel.
3.6.	+ Fidel Schuoler-Albin, Tschamut, 34 onns, d'in accident.
6.6.	Nozzas da dr. Carli Berther da mistral cun giuvna Gendre da Friburg.
14.6.	Neiv, cufla e freid
15.6.	Serein, la damaun purgina.
22.6.	Neviu sco da miez unviern
1.7.	Cargau las nuorsas
6.7.	Cargau ils schetgs
10.7.	Cargau las vaccas
NB	La primavera 1946 e stada fetg bletscha e macorta, strusch in bi di, cunzun ils meins zercladur.
7.8.	+ Berther Sigisbert da Gion Paul, Camischolas, 74 onns
10.9.	Fatg ina processiu e Sutcrestas (Maria-Hilf) per bialaura.
13.9.	Fiera da Sedrun, stau schliata fiera tier esser biars e buns tiers.
13.9.	+ Peder Dumeni, Cavorgia, 27 onns (suicid, malsauns dil spért)
15.9.	+ Huonder Sigisbert, Sedrun, 78 onns vegls
30.9.	+ In affon pign da Paul Benedetg Venzin, Selva
1.10.	Scargau las davosas alps
2.10.	Dau lartg ils tiers
9.10.	+ Anna Maria Loretz (da pign Loretz), Selva, 84 onns
10.10.	Zavrau las nuorsas
15.10.	+ Soliva Hedwica (da Battesta) 15 onns
17.10.	Batten d'in affon da Schmid Josef, Salins
25.10.	Setschentaun in areoplan els plauns Camischolas (dadens Mira)
26.10.	+ Turtè Venzin, Rueras, 76 onns
	La stad 1946 ei stada buna, buca grondas malauras, mo bia cuortas bialauras. Fretg ha ei dau endretg, magrad che graun e truffels han giu munconza. Gl'atun ha fatg bien e stau bials dis. Ils tiers gronds han differents schau ora entochen ils 25 d'october. Ils 29 d'october ha ei dau l'emprema bischa.
14.11.	Nozzas: Schmid Luis e Maria Berther (Nossadunnaun)
27.11.	+ Caduff Cresenzia da Gion Giachen, Camischolas, 4 onns, pelletschas (<i>difteria, inflammaziun dil culiez</i>)
28.11.	+ Berther Anna Maria da Hans Giachen, Camischolas, 45 onns, morta giu Waldhaus
1.12.	Serrau en unviern
5.12.	+ In affon da Riedi Giachen Giusep, Tschamut, ½ onn
9.12.	+ Brugger Lezi Antoni, Rueras, *1868, 78 onns
10.12.	+ Soliva Anna Maria da Bruno *1882, 64 onns
1947	
	Il meins schaner ha giu ina jamna da ferdaglia. Il pli freid eis ei stau 24 grads sut null e quei ils 25 da schaner.
11.2.	Nozzas: Monn Gion Andriu ed Ursulina Deragisch, ella Cruna
14.2.	+ Ina poppa da Fidel Monn, Sedrun, circa in meins veglia
	Gl'unviern 19 ha il vidruscal (<i>Masern</i>) regiu fetg tier ils affons. En ina scola da 36 scholars, eran in di mo 12 scholars. Era ha la grippa fatg numerusas visetas tier ils carschi.
16.3.	+ Dunna Cecilia Peder (da Luis), Tschamut, 39 onns, mumma da 3 affons pigns.

19.3.	+ In affon (buob) da strusch 2 onns da scolast Toni Hendry
14.4.	Nozzas: Valier Benedetg e Cecilia Soliva; Berther Giusep e Valier Ludovina, Hotel Oberalp
24.4.	Nozzas: Monn Benedetg e Monn Anna; Monn Luis e Monn Antonia, Hotel Oberalp
27.4.	+ Cavegn Adolf dad Adolf, 44 onns, sia veta miez schiraus
	Gl'unviern 1946/47 ei staus fetg moderaus. Buca liungas ferdaglias, neginas cuflas e pauca neiv, buc sur 80 cm. Ils 10 d'avrel fuv'ei terren, all'entschatta matg quasi finiu las lavurs dil funs.
5.5.	Fatg mundi cun ils s.v. pors
6.5.	Entschiet a schar ora tiers gronds.
16.5.	Fatg mundi cun las cauras.
27.5.	+ Vigeli Valier (Catriner), Camischolas, n. 1871, 76 onns
25.6.	Cargau ils schetgs
1.7.	Cargau las vaccas
	La primavera 1947 ei stada in'aparti buna. Il davos zercladur flurevan ils glins ed ils ers segal fuvan circa in meter aults. Perfin izuns madirs er'ei d'anflar. Insumma en tut priu fuv'ei 10-15 dis pli anavon ch'auters onns.
10.8.	+ Culastia Gieriet-Berther, Rueras, 52 onns, n. 1895.
	La stad 1947 eis ei stau dils 20 da fenadur entochen ils 24 da settember mo dus dis malaura, pia ina fetg biala stad cun caliras sco aunc mai, mo bellezza dis. Malgrad la gronda schitgira ha ei dau bia fein e risdiv ed era il garnezi e la trufla ha cuntentau. Mender steva ei en la Bassa, nua ch'ils purs han en certs loghens stuiu dismetter quasi tut il muvel per munconza da pavel. – Ils 24 da settember ha ei dau cheu ina gronda bischa, aschia che tut las alps han stuiu vegnir scargadas. Silsunter ha la bialaura puspei continuau.
3.10.	+ Sur dr. Maurus Brugger da Rueras, n. 1901, 46 onns.
18.10.	+ Monn-Venzin Catrina, dunna da Anton, 57 onns
20.10.	+ Berther Plazi, Cruna, 54 onns (ledis)
20.11.	Serrau en unviern
26.12.	+ Linus da Baseli Monn, Camischolas, 4 onns (pelletschas)
31.12.	+ Barla Catrina Jacomet d'Alfons
	Gl'onn 1947 ei staus tras a tras in bien onn
1948	
13.1.	+ Vigeli Deragisch, Bugnei, 78 onns, ledis
19.3.	+ Jacomet-Monn Mariuschla, n. 1894
	Gl'unviern 1947/48 ha ei dau quasi pli bia plievgia che neiv. Brut e humid dil november entochen miez fevrer. Lura ha ei fatg jamnas ora bellezza dis. La fiasta da Pastgas, ils 29 da mars, fuv'ei tut terren e schetg ils plauns. Il davos mars luvrahan ei il funs tscheu e leu.
4.4.	Ha sur Giachen Antoni Fetz bandunau Sedrun e seretratgs sco privat a Mustér, suenter ina pastoraziun da 25 ½ onns sco plevon da nossa pleiv.
9.4.	+ Barla Catrina Deragisch, Sedrun, 74 onns, matta veglia
11.4.	Installaziun dil plevon niev sur Gisuep Durschei da Segnas. Vegniu fatg gronda fiasta cun parada.
28.4.	Nozzas: Monn Tumaisch e Catrina Soliva; Hendry Luis e Monn Carmelia, Oberalp

3.5.	Fatg mundi cun ils s.v. pors
5.5.	Fatg mundi cun las nuorsas ed entschiet a schar ora tiers gronds.
18.5.	Fatg mundi cun las cauras
26/27.6.	+ Sur Hans Giachen Venzin, caplon a Selva, n. 1871.
1.7.	Sligiau tuts uffecis d'uiara, sco era tuttas marcas da raziun suenter in decuors da quasi 9 onns.
3.7.	Cargau ils schetgs
6.7.	Duevan las vaccas vegnir cargadas. Enstagl han ins puspei stuiu scargar ils schetgs muort neiv e freid. Ils 9 ei tut turnau ad alp. Entgins purs da Rueras han denton pervesiu en nuegl las vaccas e cargau quellas per ils 12 da fenadur ed aunc stau baul avunda, adina freid e bletsch.
12.7.	Messa nuviala da sur Christian Monn da Gion Antoni Monn-Beer, Rueras. Stau gl'entir di malaura.
20.7.	Entschiet puspei cun fenar, suenter pli ch'in meins freid e bletsch.
31.7.	+ Dr. Carli Berther da mistral, 35 onns vegls. Morts d'ina daguota sin l'Alp Nadels a Trun. Pertut gronda consternaziun.
18.8.	+ Lucas Cavegn-Schmid da Cadruvi, 72 onns, anflau el morts d'ina daguota sin Budas (sur Dieni) en siu faner, nua ch'el fuva serendius quei di per fenar.
9.9.	Fiera da Sedrun. Stau ina buna fiera. Buns tiers han pagau varga 2000 frs.
27.9.	Descargau las davosas alps da tiers gronds.
4.10.	Dau lartg.
7.10.	Descargau las nuorsas.
7.10.	+ Vigeli Monn, vegher, Rueras, d'in accident, n. 1899, ledis.
16.11.	+ Sep Antoni Peder, Selva (Gion Martin), ledis n. 1882 (senumnavu uestg da s. Brida)
17.11.	+ Giachen Antoni Schmid, Sedrun, caluster, n. 1878
3.12.	+ Venzin Tumaisch, Rueras, ledis, n. 1874
17.12.	+ Valier Maria Ursula, "Tengia", (<i>surnum da derivonza, la mumma ei stada la Otillia (Entengia) Hendry</i>), Camischolas, n. 1873. Quei di ha ei dau l'emprema neiv d'unviern cun 30 cm.
18.12.	+ Maria Barla Hitz (dunna da pign Hitz), Rueras, n.1883
1949	
2.1	+ Gion Antoni Loretz, Selva (pign Loretz), n. 1889
6.4	+ Gion Chrisost Monn, Rueras, 49 onns, ledis, staus la gronda part da sia veta disturbaus dil spért.
	19/49, stau in bien unviern, buca bia freid e pauca cufla, Gl'entir meins fevrer eis ei stau bialaura, il mars encuntercomi bia malaura. Gl'avrel ha puspei fatg bien, da maniera ch'ins ha saviu far la gronda part dallas lavurs dil funs. Alla fin dil meins fuv'ei schon in bi pastg e terrenau tochen sum.
2.5	Entschiet a schar ora tiers gronds ed enqual perfin a mises, denton buca per abundonza da fein.
9.5	Fatg mundi cun las nuorsas.
10.5	Fatg mundi cun ils s.v. pors. L'emprema mesadad dil meins eis ei stau cufla e freid.
11.5	Genoveva Berther-Peder, Camischolas, n. 1900, 49 onns.
14.5	Nozzas da Giochin Hendry e Rosa Berther.
23.5	Fatg mundi cun las cauras.

11.6	Grond incendi allas 10 dalla sera a Selva. Barschau giu gl'entir vitg cun excepziun da duas casas, la sennaria ed il pistregn. En gl'interval d'ina mes'ura ei tut stau en flomma, aschia ch'igl ei stau da spindrar pauc. La glieud han ual aunc pudiu sedeliberar ad uras, ferton ch'igl ei restau circa 60 tiers manedels el fiug.
28.6	Cargau ils schetgs.
2.7	Cargau las vaccas.
	La primavera 1949 ei stada buna tochen fetg buna. Da tutta bialaura ei il fenar s'avanzaus, aschia che la gronda part dil fein grass fuva sut tetg miez fenadur. – Bia e bien fretg.
28.7	Barschau in baghetg a Gonda sper casa da Lucas Soliva. Grazia al prompt agid e bien cundrez d'aua, eis ei reussiu da retener ina pli gronda catastrofa.
8.9	+ Sep Maria Giger (da Medel), Rueras, 90 onns, il senior dalla vischnaunca.
27.9	Pigliau fiug a Camischolas en casa da Gion Paul Berther, en ina combra. Havend observau il prighel ad uras ed era sur miezdi, eis ei reussiu da stizzar ualti spert. La notg sisura allas duas, rebatta puspei il clom da fiug a Sedrun. Dus baghetgs sur il hotel Oberalp ein en fiug e flomma. Grazia al spert agid ed alla ruasseivladad dils vents, eis ei stau pusseivl da prevegnir d'ina pli gronda catastrofa. Il donn ei considerabels, essend ual en tut la raccolta, iseglias etc. e per part segirau pauc ni nuot.
	In onn d'incendis cun temas e fetgas!
3.10	Dau lartg
27.10	Dau l'emprema neiv, silsuenter stau repetidamein terren e bischas e lu serrau en unviern cun pauca neiv circa alla fin da november.
30.11	+ Cavegn-Deragisch Plazi, Sedrun, 52 onns, n. 1897
1.12	+ Beer Clementina, Camischolas, 79 onns
1950	
8.1	+ Soliva Cresenzia da Battesta, Sedrun, 82 onns
16.1	+ Dr. Stiafen Berther a Mustér, satraus a Sedrun, 81 onn
16.4	+ Schmid Luzia, Salins, 80 onns
16.5	+ Thomas Berther, Cruna, morts a Rapperswil, satraus cheu, 58 onns
19.5	+ Gada Biart, 50 onns, la davosa da quella schlatteina.
	Gl'unviern 1949/50 ei staus in migeivel. Neiv havein giu in bien ton dapli ch'ils davos onns, perquei eis ei era vegniu pli tard terren. Ils 10 da matg fatg mundi cun ils s.v. pors (<i>salva venia, era s.h., salva l'honor, mit Verlaub zu melden</i>), ils 23 da matg cun las cauras.
26.5	+ Giossi-Giger Filomena, Rueras, 62 onns
16.6	+ Carmelia Gieriet-Deragisch, Camischolas, 43 onns
	Cargau ils schetgs
	Cargau las vaccas
	Stau ina fetg buna primavera.
14.8	+ Beer Giusep da Bistgaun, Gonda. Fuva ius sil Tgom per izuns, anflau el l'autra damaun morts sper il trutg da Paliz cun la brenta si dies. Supponiu ina daguota dil tschurvi. Generala consternaziun, essend in brav giuven da 23 onns che aveva ual finiu ils studis da scolast.
23.8	+ Deragisch Giachen Antoni, ledis, Sedrun, 82 onns
2.9	Scargau las davosas alps da tiers gronds
5.10	Dau lartg, fuva pauc pastg
13.10	Scargau las nuorsas

	La davos jamna da settember eis ei stau missiun a Sedrun e l'emprega d'october a Rueras, tenuta dils missiunaris Theodosius Sialm e Teofrid.
	Gl'onn 1950 ei staus in bien onn da fretg, cunzun da fein e risdiv, graun e truffels mediocher.
14.10	Avertura dalla stizun nova, baghegiada ora en casa pervenda veglia, Sedrun.
2.1	Dau circa 30 cm neiv, puspei ida ora sur s. Martin ed ils 14 da november turnau a never pir che mai (serrau en unviern) (memia baul)
8.11	+ Maria Ursula Schmid-Monn da Zarcuns, 63 ½ onn
13.11	La damaun da s. Martin allas quater, barschau giu in baghetg a Mila sut Rueras, partenent a Paul Riedi. Fuva en circa diesch tschaveras fein e segirau nuot.
28.11	+ Giachen Antoni Giossi, Rueras, 72 onns
6.12	+ Ludiwig Monn, Surrein, 31 onns, ledis. Sedisgrazias egl uaul Cavorgia visavi Nacla. Vegnius sut ina plonta en e staus morts sil plaz.
12.12	+ Benedicta Deragisch, Gonda 72 onns
30.12	+ Decurtins Sep Antoni, Bugnei, daguota, 75 onns
1951	
	La jamna dils 14 sils 21 da schaner 1951 ei stau ina catastrofala. Nevü, pluü e cuflau quasi tut jamna, aschia ch'ei fuva circa 2 meters neiv. La sonda han las lavinas entschiet a vegnir dapertut e cun tutta forza. Gia la damaun annunzian ei da Tschamut, ch'ina gronda lavina hagi scuau naven entgins baghetgs e faners a Scharinas, sco era in clavau, ina casa e la casa dall'ovra electrica a Tschamut. La sera ha in'ulteriura lavina destrui totalmein ina casa nova a Selva partenenta a Toni Loretz. Deplorablamein sesanflava en quella quei mument il scolast dil liug: Gion Giusep Giossi da Rueras. Malgrad igl immediat agid dils vischins, eis ei reussiun d'anflar el pér l'autra damaun morts buca dalunsch naven dil sulom casa. La medema lavina ha lu pli engiu aunc raffau naven in faner e satrau lien Paul Benedetg Venzin. Quel ei denton prest vegnius liberaus da sia glieud, mo haveva rut in bratsch. La vehemenza da quella lavina ha pudiu contonscher l'autra vart dil Rein e sfraccu dus baghetgs dil mises Surrein. Da quei mument naven ein ils vischins da Selva stai en spir temas e fetgas. Essend ch'il prighel fuva buc aunc vargaus, han pliras famiglias passantau la notg en nuegls. Ins po cumprender co quella glieud fuva deprimida malgrad lur bialas casas novas, baghiadas ual la stad avon. L'entira vischnaunca ei stada consternida da quei schabetg. – Plinavon ha era la vart da Giuv, Val Bugnei, Pardatsch, pitü gronds donns vid bagehtgs ed uauls. Era en auters loghens da nies ed auters cantuns han quels eveniments sfrenai caschunau gronds donns a glieud, tiers, baghetgs, uauls etc. En la Val s.Pieder ha ei custau la veta a 19 persunas. En nies cantun ein varga 50 persunas vegni per la veta en la lavina. Il hotel sil'Alpsu (Oberalpsee) ha era anflau la medema sort, aunc cun ils dus cussadents consorts Nager. Dieus pertgri igl avegnir da talas disgrazias!
6.2	+ Cavegn Bernhard da Adolf, Sedrun, 47 onns, ledis, staus plirs onns malsauns e schiraus egl asil a Cumpadials.
	Aunc inaga neiv: La dumengia dils 11 da fevrer ha ei entschiet a plover, silsunter neviu entochen il mardis suentermiezdi, suenter haver giu tuccau dad auras. La massa da neiv fuva ussa carschida sin quasi treis meters, enzatgei mai secattau. Gleiti negliu fuvan ins segirs da lavinas.

	Gia la dumengia sera han ins entschiet ad evacuar las famiglias d'odem e sisum il vitg Sedrun. Ils da Zarcuns ein tuts serendi a Camischolas, sco era entginas famiglias da Rueras ch'ein setratgas ensemen. Cheu eisi denton per quella gada iu ora cun la tema. Mender stevan ils vischins da Selva e Tschamut. Sin tuttas varts semplunavan cuolms da lavinas. A Selva ein treis casas vegnidas cuvretgas d'ina lavina giud gl'ual da Rosas, senza denton far pli gronds donns. Treis dis ein quels dus vischinadis stai serrai giu totalmein. A Selva ha la glieud pssentau quels dis e notgs en nuegls, nua ch'ei vegneva perfin celebrau la s. messa. Suentar che l'aura ei stada secalmada, ha ina colonna d'agid da circa 70 persunas liberau ils habitonts da quels dus uclauns ord lur fatala situaziun. Tgi cun skis, tgi a pei, tgi sin sliusas ed auters si deis, ein tuts cun pintgas excepziuns (principalmein perveseders) vegni transportai a Rueras, Camischolas e Sedrun. Gia udevan ins che plirs vischins da Selva e Tschamut veglien ussa insumma emigrar ord la val, ins po cumprender tgei quels han fatg atras. Il Segner ha denton preservau quella gada da pli grondas disgrazias.
7.3	+ Hans Giachen Decurtins, Sedrun, actual president communal e deputau, 66 onns. Um robust, morts suenter cuorta malsogna. Grond til da bara dalunsch e damaneivel, stimaus entras ses numerus uffecis.
8.4	+ Veronica Monn da Gion Antoni meister, Sedrun, 70 onns
23.4	+ Venzin Constanzia da Paul, Rueras, ledia, 30 onns.
27.4	+ Valier Augustin da Franzestg, Camischolas, 2 onns
	Las nevadas dil schaner e fevrer vulan buca ceder. La fin d'avrel havevan aunc circa 50-60 cm neiv els plauns. Ils 29 d'avrel ha ei aunc inagada dau in meter neiv nova, aschia ch'ins ha buca saviu far la processiuon dallas Rogaziuns dils 30 d'avrel a Sutcrestas.
7.5	+ Vigeli Venzin-Giger, Rueras, vegl president communal, 76 onns
15.5	Entschiet cun las lavurs dil funs els plauns.
25.5	+ Monn Maria da Gion Felici, Camischolas, 78 onns
25.5	Entschiet ad ira cun ils tiers a mises (mo els mises da casa).
28.5	Fatg mundi cun ils s.v. pors
9.6	Fatg mundi cun las cauras
	1951 encunter primavera han ils purs stuiu retrer da sutsi ciras 150 000 kilos fein (15 t) mo en nossa vischnaunca. Ina sensibla expensa (circa 30'000 frs.)
15/16.7	Cargau ils tiers gronds
2.9	+ Cavegn-Schmid Carlina da Florentin, 79 onns
23.9	+ Giossi Cristian Giachen, Rueras, 73 onns
1.10	Scargau la davos' alp da tiers gronds.
4.10	Dau lartg
13.10	Scargau las nuorsas
23.10	Nozzas: Tumaisch Cavegn, Rueras e Maria Rosa Deflorin, Zarcuns. Quei di fuv'ei circa 35 cm neiv (l'emprema).
26.10	+ in affon da Paul Deplaz, Rueras, ca ½ onn
22.10	+ in affon pign da Caduff Gion Crisost, Rueras
29.11	Serrau en unviern
1952	
20.1	+ Albin Sep Maria, Tschamut, ledis, 49 onns
3.2	+ Berther Mariuschla da Gion Fidel, Rueras, 83 onns
18.2	+ Monn Anna Maria da Plazi, Sedrun, 68 onns
29.2	+ Marta Berther, dunna da mistral Berther, Camischolas, 67 onns

8.4	+ Tumaisch Schmid da consum, ledis, 81 onn
	Gl'unviern 1952 ei staus in migeivel, mai grondas cuflas e nevadas. A Selva ei vegniu giu inaga ina lavina dalla Val Ruinatsch e rut en enqual finiastra e scarpau giu tgamins dallas casa novas. Ils 15 d'avrel fuvan ils praus terreins, aschia ch'ei han saviu entscheiver cun las lavurs dil funs.
25.4	+ in affon (buoba) da Tumaisch Monn-Soliva, circa ½ onn.
2.5	Entschiet a schar ora ils tiers gronds sin pastira da casa.
5.5	Ein ils emprems i a mises.
17.5	Fatg mundi cun las cauras.
1.5	Nozzas: Gaudenz Loretz e Ludivina Schmid
14.5	Nozzas: Luis Cavegn e Jacomet Christgina
5.6	Nozzas: Monn Fidel da Gion Battesta e Venzin Emilia, Selva
6.6	+ Vigeli Beer-Monn, genau, 60 onns (staus dus onns e miez schiraus) naschius 1892
26.6	+ Baseli Schmid da Placi, Sedrun, 34 onns, ledis, morts en consequenza d'ina disgrazia ad Ursera. Daus giu d'in casa ils 24 da zercladur 1952.
28.6	Cargau ils schetgs
3.7	Cargau las vaccas
20.7	Messa nuviala da sur Tumaisch Berther, Dieni
7.9	Dau ina bischa ch'ins ha stuiu scargar las alps da schetgs entochen ils 10 da settember.
12.9	Puspei neviu e stuiu turnar a casa cun ils tiers entochen ils 15 da settember.
20.9	Danovamein dau ina neiv da maniera ch'ei han stuiu prender ils tiers ord las alps.
28.9	+ Vigeli Cavegn, pot, Rueras, 78 onns, ledis, morts en consequenza d'ina curdada giud in ladretsch a Dieni.
2.10	Neviu schi fetg ch'ins ha stuiu scargar las nuorsas
8.10	Dau lartg.
10.10	Rischlau il davos risdis e finiu cun ils truffels. Stau in freid e bletsch settember, visavi la fetg caulda stad.
	1952 Raccolta: Fein daried, risdiv sil pauc, graun e truffels mediocher. Igl october 1952 ei stau in freid e mitgiert, il november aunc in mender. Serrau en unviern all'entschatta da quei meins, da s. Martin fuv'ei cira 1 meter e 30 neiv. Atun eis ei insumma stau in schliet sco da regurdientschas mai. Ultra da quei ein ils prezis dils tiers stai sbassai per circa 500 frs. il tgau visavi gl'onn vargau. Pia ina situaziun quasi catastrofala.
2.12	+ Anna Maria Beer-Gieriet da Bistgaun, 61 onn
4.12	+ Ludivina Monn (Sepra), 86 onns
8.12	+ Sabina Venzin, Selva, 85 onns
13.12	+ Paul Cavegn, Rueras, ledis, 82 onns
1953	
24.1	+ Martin Pally da Camischolas, 81 onn
30.1	+ Giachen Antoni Berther, morts e satraus a Tavau, 68 onns
26.2	+ Leci Hendry, calger, Surrein, el 69avel onn
23.3	+ Gion Antoni Giossi, Rueras, ledis, 73 onns
26.4	+ In affon pign, baret, da Luis Hendry, Cavorgia
	All'entschatta da matg fuvan las lavurs dil funs prest finidas tochen tier ils truffels. Ils 2 da matg han ils emprems schau ora ils tiers gronds, ils 4 da matg ein enqual i a mises (damaneivel).

3.5	Stau cumin. Dr. Emanuel Huonder da Mustér ei vegnius mistral, suenter che mistral Gieri Vinzens da Trun ha remess igl uffeci. Igl ei stau in bi di, mo il resultat ha tonaton buca cuntentau tuts, principalmein tier ils deputai (10 candidats e mo 7 sessels).
23.5	+ Barla Catrina Berther da Tumaisch Curschellas, 89 onns
25.5	+ Gion Andriu Jacomet da Vigeli, student, negaus a Sarnen, 22 onns
19.5	Fatg mundi cun las cauras
11.6	+ Sur canoni G. A. Brugger da Rueras, 82 onns
18.6	Cargau las nuorsas
21.6	Mechel Loretz da Selva, 70 onns
25.6	+ Luzia Jacomet-Beer da Gebhard, 53 onns
27.6	Cargau ils schetgs
2.7	Cargau las vaccas
	La primavera 1953 ei stada da lunas. Il matg caliras, il zercladur gl'emprem freid e suenter bletsch, strusch in di bialaura. Ils 13 da fenadur saviu entscheiver a fenar.
13.7	+ Genoveva Hendry, Surrein, ledia
15.7	+ Ludovic Caduff da Gada, Camischolas, in giuven da 22 onns sedisgrazias sin l'Alpsu anetgamein tier in'explosiun da crappa.
30.7	+ Gion Andriu Berther, Camischolas, vegl president communal, 85 onns
12.8	+ Ina buoba da Gion Andriu Monn, Sedrun, 1 onn
9.9	+ Giuanna Schmid, Cavorgia, 80 onns, ledia
20.9	+ Alfons Hitz, Dieni, ledis, 56 onns
24 e 25.9	Scargau tut las alps da tiers gronds
3.10	Dau lartg.
	La stad ed igl atun 1953 ein stai cuntenteivels. Fein ha ei dau daried e risdiv fetg daried. La raccolta da graun e truffels ei stada empau mendra.
7.10	Fatg in viadi cun auto dalla Firma Murer SA sul Lucmagn – Bellinzona – Locarno – Brissago – Stresa – Como – Chiasso – Lugano e puspei a casa. Patrticiponts, la suprastonza da vischnaunca cun ils treis commembers dalla cumissiun d'auas. Stau bi!
29.10	Dau l'emprema bischa, quella ei puspei ida ora e silsuenter stau terren e bialaura tut november ora entochen ils 20 da december.
18.12	+ Gion Antoni Cavegn (il pign Cavegn) da Rueras, 72 onns, giu negina famiglia.
1954	
3.3	+ Maria Schmid-Curschellas (Balzra) da Cavorgia, giu negina famiglia. Ils davos onns stada a Mustér egl asil e morta leu, 90 onns.
7.4	+ Placi Berther da Valentin, Sedrun, 18 onns, stau in giuven che ha ditg stuiu pitir e la finala morts a Turitg el spital.
	Gl'unviern 1954 ei staus in migeivel, buca bia neiv e pauc freid. Mars in bi, avrel bia neiv. Saviu entscheiver cun las lavurs dil funs la davosa jamna d'avrel.
15.5	Entschiet a schar ora sin pastira enqual muvel.
17.5	Fatg mundi cun ils s.v. pors, ils 28.5 cun las cauras.
19.5	+ Giachen Fidel Cavegn-Hitz, Rueras, 83 onns
5.6	+ Genoveva Hendry da Giachen da Cavorgia, 60 onns
10.6	Pluiiu e neviu igl entir di.
22.6	Cargau las nuorsas.
2 e 2.7	Stau concludiu da cargar ils tiers gronds. Muort plievgia e neiv, han ins stuiu refierer sin ils 5 e 6 da fenadur. Ils 7 da fenadur ha ei puspei cuflau

	e neviu da maniera ch'ins ha puspei stuiu vegnir ord las alps per part cun tiers. Las stiarlas da Strem han ins allura saviu cargar puspei per ils 12 fa fenadur.
	La primavera 1954 ei stada pauc emperneivla. Bia plievgia e freid e scartezia da fein els mises.
	Ils 17 da fendur ei puspei stau bialaura, suenter ditg buca pli. Rischlau gl'emprem fein e quei buca bien.
17.7	+ Nescha Caduff da Gion Fidel, Rueras, 52 onns, ledia
30.7	+ Onna Maria Derungs, 74 onns
16.8	+ In affon da circa in onn da Stiafen Riedi, Tschamut
28.9	Scargau la davosa alp (Cuolm Val)
	La stad 1954 ei stada ina fetg bletscha. Dapi 50 onns mai stau ina stad cun aschi pauc sulegl. Fein ha ei dau daries ed aunc saviu far en bien la gronda part. Risdiv ha ei dau pli pauc e pauc sec. Stau in lungurus far risdiv, quasi gl'entir settember. Graun pauc, ils segals strusch madirs e per part aunc da meder gl'emprem october. Ils prezis da tiers ein megliers e pli cuntenteivels ch'igl onn vargau.
30.9	+ Cecilia Hendry-Schmid, Cavorgia, 27 onns, morta en pigliola, igl affon ei vivius.
6.10	Dau lartg.
8.10	Scargau las nuorsas (neiv).
11.10	+ Gion Felici Monn da Camischolas, vegl deputau e president communal, 78 onns. El ei staus si um fetg popular e respectau sco ufficial ed oratur. Ils davos 10 onns eis el denton muort malsogna staus zun retratgs.
3.11	+ Barla Giger-Hitz, Selva, morta anetgamein d'ina daguota cun 44 onns.
15.11	Dau l'emprema neiv e cufla. Suenter paucs dis ei quella puspei svanida.
5.12	Serrau en unviern.
1955	
21.1	Ambrosi Schmid da calger, sedisgrazias a Turitg mortalmein sin via sut in auto.
13.2	Ha nossa vischnaunca, sco era las ulteriuras vischnauncas dalla Cadi, dau la concessiun dallas auas alla NOK Baden.
9.3	+ Sep Martin Beer (*1882), Rueras, 73 onns
6.4	+ Hitz Gion Antoni, Rueras, 82 onns
15.4	+ Anna Doris Flury da Camischolas da 4 onns. Dada en in vischi cun aua caulda e morta en conseguenza da quellas blessuras.
22.4	+ Beer Christian da Gion Antoni, Gonda, 27 onns, staus plirs onns malsaus dil spert.
	Gl'unviern 1954/55 ei staus in lungurus. Paucs bials dis, plievgia e massa neiv. Cun la lavur dil funs han ei savi entscheiver la davosa jamna d'avrel. Ils 12 da matg schau ira sin apstira ils emprems tiers gronds. Ils 13 da matg fatg mundi cun ils s.v. pors. Ils 27 da matg fatg mundi cun las cauras. Ils 25 da zercladur cargau las nuorsas. Ils 6 e 7 da fenadur cargau ils tiers gronds. La primavera 1955 ei stada mediocra: Neginas bischas, mo freid, plievgia e pauc sulegl.
7.7	+ Huonder Christgina da Sigisbert, 80 onns, morta ulti anetgamein.
15.8	+ Sur canoni Benedetg Venzin, vicari general, Cuera, 63 onns
	La stad ei stada pauc megliera che la primavera. Saviu entschiver cul fenar ils 16 da fenadur. Treis jamnas sissu ha ei fatg malaura e saviu

	rischlar mo in di per jamna ed aunc la dumengia. Dau bia fein, mo pauc bien. Finiu en il grass pauc avon ils 20 d'uost.
23.9	+ Giachen Hendry da Cavorgia, 74 onns
	Entschiet cun il risdiv muort plievgia per ils 12 da settember e finiu quel alla fin da quei meins. Dau ualti daried e saviu far il bia bien. 1955 ein bein enqual sort fein magher buca vegnida segada, per consequenza dalla cuntinuada schliat'aura. Scargau la davosa alp, Cuolm Val, ils 28 da settember.
6.12	Dau lartg
16.10	+ Sep Antoni Schmid (*1882), Zarcuns, 73 onns. Quei di fuva el ius a Mompe Tujetsch a perdanonza. Sin viadi da retuorn, ual ord casa, croda el anetgamein a tiara ed ei ina bara.
6.11	+ Barla Schmedt da calger, 70 onns
12/13.11	Ei G. A. Jacomet da Peisel, Segnas, in um dad 80 onns vegnius en Tujetsch e sparius. Suentar ditg encurir, han ins ils 18 da november anflau el ensasium la via dil Tgom (ella Vallatscha) morts e schelaus. Pli baul fuva el staus biars onns pastur en nossas alps.
24.11	Dau l'emprema neiv d'unviern, pauca.
26.11	+ Ignazi Soliva (*1894), 61 onn, ledis. Paucs dis avon ha el giu pigliau in accident.
7.12	+ Gion Antoni Monn-Venzin, 69 onns. Staus plirs onns malsaus da spért.
9.12	Satrau cheu ina matta Derungs da 52 onns. Fuva ina biadia da Vigeli Deragisch da Bugnei e steva a Turitg.
23.12	+ Vigeli Hendry, Cavorgia, 82 onns.
25.12	+ Luis Jacomet-Derungs (*1899), 57 onns.
26.12	+ Gion Antoni Monn, vegl forester, 75 onns.
18.12	Ha la radunonza da vischnaunca concludiu da dar 40'000 frs. per ina nova orgla ella baselgia s. Vigeli.
1956	
19.1	+ Tresa Deragisch d'Emanuel, Gonda, 78 onns.
25.3	+ Arthur Venzin da Giachen Giusep, Selva, 13 onns.
	Gl'unviern 1955/56 ei staus dallas uisas. Entochen alla fin schaner pauca neiv, circa 30 cm. L'entschatta fevrer ha ei dau circa 50 cm e vegniu ina ferdaglia mai stada, entochen -34 grads. Pauc nia bia ha quella cuzau treis jamnas.
18.2	Ha la radunonza da vischanunca concludiu da separticipar vid l'ovra electrica NOK cun ½ milliun en aczias.
2.4	+ Christgina Venzin da Paul Custanzer, Rueras, 71 onn
	La primavera 1956 ei stada cuorta. La pauca neiv digl unviern ei stad fetg redeivla. Aunc il matg viaden fuva la tiara tscheu e leu schelada. Saviu entscheiver a schar ora tiers gronds ils 18 da matg. Ils 29 da matg fatg mundi cun las cauras. Funs e pastiras ein denton serefatgs cun ried. Gia all'entschatta zercladur fuv'ei quasi envernau ils mises damaneivel.
8.6	Ha ei dau ina pulita neiv tochen dem.
28.6	Cargau las nuorsas
9 e 10.7	Cragau ils tiers gronds
	La primavera ei stada pauc emperneivla, adina freid e bletsch.
3.8	+ Giusep Berther da Valentin, 16 onns, staus in per onns malsaus e giu pressapauc la medema malsogna sco siu far morts ils 7 d'avrel 1954.
13.8	Rut ora in cass da malsogna a Rueras. Fatg giu ina vacca, 6 cauras e 2 pors. Virolau ils tiers dall'entira vischnaunca, paucs dis suenter curdau

	aunc in vadi, 10 dis suenter ei la zoppina rutta ora ell'alp Nalps, nua ch'ei han fatg giu 9 vaccas, 8 s.v. pors e 148 cauras (tuttas). Tuts tiers da casa da Maunsut, Sedrun, Camischolas e Rueras han stuiu vegnir teni 15 dis en nuegl e tut negozi serraus entochen gl'october, en tut priu ha quei caschunau gronds donns.
4.10	Dau lartg, mo gleiti sissu dau neiv e serrau en ils tiers gronds.
30.8	+ Onna Catrina Caduff, Rueras (dil Crest), 71 onn
	All'entschatta november ein ils Russ penetrai en l'Ungaria e circumdau Budapest. Ei ha dau disuorden e bumbardaments. Bia glieud giuvna ei vegnida deportada en Russia. Auters Ungarès, varga 160'000 persunas han stuiu fugir ell'Austria. Leu ein quels fugitivs vegni reparti en autras tiaras. La Svizra ha priu si circa 10'000 persunas e gidau generusamein quella paupra glieud. Nossa vischnaunca ha concludiu da dar 2000 frs. Il medem temps ein ils Iserialits ensemen cun la Frontscha ed Engheltiara i encunter l'Egipta, vul dir il canal dil Suez. Tuttas tiaras ein serebalzadas encunter tals agirs e giu da schuffa da consolidar quellas debattas. Il prighel ei denton aunc adina spanionts. Quei ha giu per consequenza che massa glieud ha fatg grondas reservas da maglias. En paucs dis havein giu svidau ils magazins e mo cun breigia havein puspei saviu redember suenter e quei per part cun augmentaziun da prezis,
17.11	+ Giachen Giusep Venzin, Selva, morts dalla daguota si Caspaua duront perver.
3.12	Ha il Cussegl naziunal eligiu signur dr. Giusep Condrau da Mustér sco siu president per 1957, suenter ch'il Grischun aveva 42 onns buca giu tals uffecis.
12	+ Cristgina Riedi da Paul, Rueras
28.12	+ Gion Paul Berther (*1956), 50 onns, dalla daguota.
	1956 ei vegniu baghegiau ina funiculara si Cungieri entras ina SA.
1957	
13.1	+ Dunna da Decrusch Josef, 44 onns, mumma da 9 affons pigns.
14.2	+ Hendry Benedetg (*1906), Cavorgia, 51 onns
	Gl'unviern 1956/57 ei staus fetg migeivels. Mai stau pli che circa 40 cm neiv. Ils 19 da mars fuvan ils plauns terrens ed ils 20 da mars entschiet a luvrar il funs, il quel fuva quasi finius l'entschatta matg. Certins han schau ora tiers gronds igl avrel sin pastira.
30.4	Fatg mundi cun ils s.v. pors
14.4	Ha la radunonza da vischnaunca approbau in project per la casa da scola Rueras cun in cuost da 452'000 frs. – Igl ei stau ina vischnaunca cun bia critica, ord la quala igl ei naschiu silsuenter gronda politica e schizun in'iniziativa. Quell'iniziativa, la quala basegna 2/3 dallas vuschs per rumper il conclus prius, ha buca giu il giavischau success. Tier la radunonza da vischnaunca dils 12 da matg ei il sura conclus cun in surpli da 14 vuschs (1/3 + 14 vuschs dils votants) vegnius confirmaus.
18.5	Fatg mundi cun las cauras
3.6	+ Duri Battista Giossi, Rueras, ledis 35 onns, staus ditg malsauns.
24.6	Cargau las nuorsas
28 e 29.6	Cargau ils tiers gronds malgrad ch'igl ei stau ina freida e bletscha primavera. Stau paucs bials dis.
28.6	+ Mariuschla Berther (Mariuscha), Rueras, 75 onns, ledia
26.10	Scargau tut las alps
27.10	+ Barla Catrina Hendry-Peder da Giachen Antoni, 78 onns

1.10	Dau lartg
2.10	Dau neiv ed er stuiu scargar las nuorsas.
2.10	+ Battesta Soliva (Pensium), 75 onns. Staus biars onns vitturin.
4.10	+ Schmid-Schmid Vigeli, Cavorgia, 74 onns (daguota), anflau morts
2.11	Giachen Baseli Berther (Hoieta), Rueras, 61 onn, ledis
14.12	+ Duri Vigeli Soliva, 78 onns
27.12	Onna Maria Huonder da Sep Flurin 64 onns, ledia, stada repetidamein malsauna da spért.
28.12	+ Gion Michel Peder (*1904), Selva, scolast, 53 onns, ledis. Dapi entgins onns malsauns (epileptic). Fuva quei di sin via en las Vals, sto haver pigliau mal e curdaus surengiu: Vischins ein fruntai encunter la sapia (?) e dubitau il discletg. Facticamein ei Gion Michel vegnius anflaus morts leugiu sper il Rein.
	Igl onn 1958 auda denter ils buns, malgrad che la stad ei stada fetg bletscha. Fretg ha ei dau daried e la gronda part bien. Ils prezis da tiers ein stai buns. Per fortuna han ei saviu vender quels baul, pertgei miez october ei la malsogna rut'ora el contuorn da Glion e ha serraui tuttas fieras per circa in meins.
1958	
1.1	+ Cavegn Regula da Gaudenz, 5 onns. Cun scarsola fruntada cul tgau encunter ina petga. Transportada ed operada (il tschurvi) el spital a Glion eis ella morta en circa 8 dis da dierna.
11.1	+ Vigeli Venzin-Riedi da Selva, 79 onns
2.2	+ Soliva Christgina (Stena), 70 onns, ledia
25.3	+ Gion Antoni Berther-Deplaz, Rueras, 61 onn, morts anetgamein dalla daguota. Staus 6 onns actuar dil consum e quei tochen la mort.
4.4	+ Monn-Berther Giachen Antoni, Rueras, 69 onns, medemamein anetgamein.
6.4	+ Berther-Huonder Tumaisch, 67 onns, staus ditg malsauns, mo alla finala morts nunspetgadamein el spital a Glion.
12.4	+ In affon d'in onn da Stiafen Riedi, Tschamut, anflau morts en letg.
	Igl unviern 1957/58 ei staus in fetg migeivel, mo liungs, cuzzau dalla fin december entochen il davos avrel. Mai stau pli che 50 cm neiv. Las lavurs dil funs han entschiet gl'emprem matg, mo adina fatg bien. Gia da miez matg ein ils emprems i a mises ed all'entschatta zercladur fuv'ei gleiti envernau. Stau ina buna primavera.
27.5	Fatg mundi cun las cauras
20.6	Entuorn ils 20 da zercladur ei la zoppina rutta ora a Medel ed ha sustau 35 tiers gronds e 150 cauras (spediu ella mazlaria).
27 e 28.6	Cargau ils tiers gronds. Muort neiv stuiu refierer sils 30 da zercladur ed 1. da fenadur.
24.6	Nozzas: Murezi Monn da Cavorgia ed Anna Maria Hendry, Surrein
2.7	+ Luis Curschellas, Surrein, 64 onns, dalla daguota, sin via
7.7	+ Gieriet Gion Antoni, Rueras, 61 onns
1.7	Nozzas da Toni Berther da mistral
15.7	+ Lezi Antoni Caduff da Gion, Rueras, 19 onns. Quei giuven fuva psater grond sil Cuolm-Val. La sera dils 15 da fenadur, havend rimnau las vaccas el letg, vegn in furius urezi cun tun e cametg. Anetgamein tucca e fiera il cametg il Lezi Antoni mortalmein a tiara. Il paster pign Anselm Berther che fuva cun el, dat medemamein a tiara sin il miert senza schientscha. El revegn denton e transportaus a casa cun pliras blessuras.
8.8	+ Hans Giachen Monn, Cavorgia, 67 onns
11.8	+ Maria Peder-Hendry, Selva, 84 onns

21.8	+ Stiafen Giger da Leci, Rueras, 13 onns. Quei mattatsch fuva en Curnera paster. Enten traversar l'aua tier ina malaura, eis el curdaus lien e negaus.
25.9	Scargau tuttas alps
7.10	Dau lartg
13.10	Scargau las nuorsas
9.10	+ Papa Pius XII morts ualti spert cun 82 onns, stau in fetg bien papa, 19 onns.
16.10	Dau l'emprema neiv e neviu in per dis, fuva 50 cm neiv.
28.10	Cardinal E. Roncalli elegius papa niev cun 77 onns, Gion XXIII.
29.10	+ Riedi Paul, Rueras, 75 onns
5.11	Barschau giu il baghetg da Paul Benedetg Venzin a Camischolas sper casa.
6.11	+ Peder Vigeli, Selva, 66 onns, ledis
4.12	+ Soliva Gion Antoni, Sedrun, 73 onns, daguota
	Il schaner 1959 ha ina lavina satrau 3 luvriers enta Nalps, 2 Austriacs ed 1 Talian.
1959	
13.3	+ Tresa Deflorin da Benedetg, Zarcuns, anetgamein suenter ina operaziun dil begl tschiec. Fuva ina taфра mattatscha da 15 onns.
15.3	Stau radunonza da delegai dalla partida conservativa a Cuera per preparar las elecziuns dalla regenza. Ei fuva 6 candidats ed ei stau dira lutga per rabbitschar giu sin dus. Stau quater scrutinis: Dr. Emanuel Huonder, Mustér Dr. Scuchetti, Plantahof Dr. Willi, Cuera Dr. Sonder, Cuera Dr. Bonatico Bruggman, Cuera Elegi: mistral dr. Emanuel Huonder e dr. G. Willi
21.3	Stau in batten (ina poppa) da Sep Flurin Caduff
2.4	+ Gion Antoni Peder, Selva, 93 onns, il senior dalla vischnaunca
2.4	Entschiet a luvrar il funs els plauns. All'entschatta matg fuva quasi tut luvrau. Unviern ei staus in migeivel e buca massa neiv.
5.5	Fatg mundi cun ils s.v. pors
21.5	Fatg mundi cun las cauras
3.5	Cumin. Igl ei stau fetg spaniond. Ei fuva 3 candidats da mistral: president Placi Jacomet, Sedrun; Hermann Lutz, Medel ed Adalbert Wieland, Sumvitg. El secund scrutini ei Wieland vegnius tscharnius. Bia canera e politica avon e suenter cumin.
24.5	+ Giachen Antoni Cavegn da grond Cavegn, Rueras, 80 onns, ledis
25.6	+ Giossi-Riedi Madleina, Rueras, 79 onns
27.6	Nozzas Willibald Berther
2 e 3.7	Cargau ils tiers gronds, stau ina biala primavera.
16.7	+ Gion Fidel Caduff-Bigliel, Rueras, 90 onns, il davos ch'ei vegnius satraus els loghens da famiglia.
9.8	+ Sur Sep Antoni Venzin da Rueras, 57 onns. Igl emperm ch'ei vegnius satraus el santeri niev (en retscha).
15.9	+ Augustina Hänggi-Beer da Gion Antoni a Basel, 55 onns
17.9	+ Decrusch Josef, 58 onns, sedisgraziaus en il magazin dalla firma Murer. Entras ina explosiun cun benzin ein las blessuras dil barschau

	stadas aschi grondas ch'el ei morts enteifer dus dis, laschond anavos 8 affons, ils biars aunc pigns. La mumma fuva era morta avon dus onns.
22 – 26.9	Scargau las alps
3.10	+ Albin Giusep, in giuven da 28 onns a Tschamut. Sedisgrazias, enten siglir sin in auto eis el curdaus sut quel e morts sil plaz.
4.10	Installaziun dil caplon niev sur Maissen Victor da Trun ed en temps abdicaziun da caplon vegl sur Rabeth ch'ei staus cheu 36 onns.
7.10	+ Pally Christgina, Tschamut, 58 onns (malsauna dil spért)
7.10	Zavrau las nuorsas
10.10	In auto da vitgira da militar ei ius surengiu sils crauns dall'Alpsu. Ei ha dau in miert e 3 blessai da Berna.
5.10	Dau lartg cun fetg pauc pastg.
28.10	Dau l'emprema neiv
16.12	+ Vigeli Deragisch, Bugnei, 24 onns, sedisgrazias a Pratteln vid il conduct electric.
17.12	+ Vigeli Cavegn-Monn, Sedrun, sedisgrazias cun in auto (trax) giul Drun tier firma Murer SA, 44 onns.
1960	
12.1	+ Venzin Maria da Gion Martin, Rueras, anetgamein, 41 onn, ledia
12.2	+ Monn-Berther Vigeli, Sedrun, 76 onns.
	La notg dils 23 sils 24 da mars (allas 00.10) ha ei dau in ferm tiaratriembel.
28.3	+ Anna Maria Caduff-Hendry, Rueras, 72 onns
19.5	Fatg mundi cun las cauras
	Entschiet a schar ora ils tiers gronds miez matg. Stau in unviern cun fetg scart da fein. Ei han stuiu retrer dalla Bassa per 50 – 60'000 frs. e quei aunc car.
18.6	Cargau las nuorsas
24.6	Cargau ils schetgs
28.6	Cargau las vaccas
	Stau ina fetg buna primavera
23.8	+ Pia Berther (*1908), Camischolas, 52 onns, ledia, anetgamein
22.8	Stau igl emprem bi di bialaura. Fuva aunc da far bia fein, cunzun grass e maghers. Stau in pauper fenar. Rischlau duas dumengias.
21.9	Puspei bischa, scargau la davosa alp.
4.10	Finiau cul far risdiv e meder, paucs dis da bialaura.
23.10	+ Riedi Margreta, Tschamut, 83 onns
15.12	+ Monn Sebastian, Seper, Sedrun, 72 onns, morts anetg sin viseta a Turitg.
1961	
8.1	Barla Catrina Berthre, sora da Maurus, 82 onns, ledia
	Avrel 1961 stau missiun. Ils 12 – 18.3 a Rueras e Selva; ils 19 – 25.3 a Sedrun per femnas; ils 26 – 1.4 a Sedrun per umens
15.4	+ Venzin Ignazi da Sep Lurenz, Selva. Ius cun auto da Rueras a Selva. En las Vals eis el desviaus tochen giu el Rein e staus morts. Motiv: probabel cun ira memia spert ed aunc alcohol, 23 onns.
	Igl unviern 1960/61 ei staus fetg raschuneivels. Sufficentamein neiv e buca zun freid. Igl avrel ei staus fetg burrius, aschia ch'ins ha saviu far quasi las lavurs dil funs. Igl emprem da matg han ei entschiet a schar ora ils tiers gronds sin pastira da casa. Ils 9 da matg fatg mundi cun las cauras. Il meins da matg perencunter ei staus mender, freid e bletsch. Ils

	29 da matg fuv'ei ina gronda bischa ed ha neviu giu la Bassa. Ils 10 da zercladur puspei bischa quasi tochen giu els praus grass.
17.6	Cargau las nuorsas.
29 e 30.6	Cargau ils tiers gronds
28.8	Entschiet cun far risdiv. En ina jamna da bialaura fuva la gronda part gia sut tetg. Miez settember eran las lavurs dil funs quasi alla fin, priu ora ils truffels. La stad 1961 ei stada fetg buna, sco mai. Dau era daried e bien fretg. Era ils prezis da tiers ein stai per part cuntenteivels.
23.9	Scargau tut las alps, bialaura e caliras.
25.9	Dau lartg
6.10	Scargau las nuorsas.
6.11	+ Caduff Battesta (*1909), Zarcuns, 52 onns, suenter cuorta malsogna.
14.11	+ Berther Luis (*1894), Rueras, ledis, staus biars onns fumegl en claustra, morts egl asil a Mustér, 67 onns
8.12	+ Cavegn Lucas, posta, Sedrun, 67 onns
	Igl unviern 1961/62 eis ei stau fetg emperneivl'aura. Biala e buna aura cun mo enqual bischa. Propi neviu e serrau giu pér ils 12 da schaner 1962. La pli ruha jamna ei stada miez fevrer.
29.1	+ Deragisch Luis d'Emanuel da Bugnei, 84 onns, adina staus naven
11.2	+ Pius Cavegn da Luis Cavegn-Jacomet, Sedrun, negaus el Rein giu Las Rueras (8 onns). Ei fuvan treis buobs sil glatsch. Vonzei rumpa quel e dus crodan lien. Fertion ch'il pign ei vegnius libers ei il grond morts.
11.2	Stau radunonza da vischnaunca per l'emprema gada ell'aula dalla scola nova. Tier quella radunonza ei vegniu concludiu da menar en 9 onns per la scola primara (30 jamnas). Tenor lescha nova havess ins saviu far 8 onns cun 34 jamnas. Il medem die eis ei era vegniu priu il conclus da crear ina scola manuala (Werkschule). Quella survescha principalmein per tals ch'ei buca qualificali per la scola secundara.
16.3	+ Gion Battesta Monn-Caduff, Sedrun, 72 onns
10.4	+ Cresenzia Jacomet (morta a Realta), 69 onns, ledia
11.4	+ Placi Monn-Beer, Sedrun, 74 onns
28.4	Creisma. Circa 170 affons, uestg Vonderach per l'emprema ga.
8.5	+ Stiafen Monn, Sedrun, 80 onns, frar dils dus sura
9.5	Constatau in cass da zoppina en in nuegl da s.v. pors. 17 tocs gronds ni pigns ein vegni dismiss. Ultra da quei han tuts tiers dils vischinadis stuiu vegnir serrai en 3 jamnas entochen ils 30 da matg 1962.
13.5	+ Venzin Gion Antoni, vegl genau, Rueras, 66 onns, ledis, staus quasi 20 onns malsauns, miez schiraus.
	Il meins avrel e matg ei stau plitost aura d'unviern, strusch in bi di. Stau ina schliata primavera, quasi adina freid e criu.
10 e 12.7	Cargau ils tiers gronds
15.7	+ Barla Catrina Venzin, Selva, dunna da Sep Lurenz, 68 onns
4 e 5.8	Stai a Zitegl. Fuva leusi circa 400 persunas. Stau bi ed edificont.
5.8	+ Albert Cavegn-Gieriet (*1899), Sedrun, 63 onns
14.8	+ Giusepa Monn- Berther da Fidel, Sedrun, 52 onns
20.8	Ina partida scholars d'ina colonia da Lucerna ei serendida entochen igl Oberalpstock (Pez Tgietschen). Sin il glatscher ein anetgamein 4 curdadas en ina sfendaglia. Ina ha saviu vegniur spindrada viva, fertion che las treis autras ein vegnidas spindradas sco baras, ina pér ils 22 d'uost, la quala fuva sco ei para en ina profunditad da circa 50 meters. Ellas ein vegnidas transportadas cun helicopter tochen sut il vitg da Camischolas e da leu el spital a Sedrun. Tresta excursiun!

	Cuntuaziun suonda!